

El Rorè d'inchee

Lè m' pezz che a vegni più a Rorè
ma a tegni d'ecc cosa e ghè
mi a m' regordi
che es naseva pissee d'acordi
anga se quai volt e s' ratelava
i gent dèl paès i s' tolerava
miga tucc i gaeva el medesim partiit
ma almen i slongava miga i diit
inchee a vedi ch' i taca lita
anga per chi che dev guidaa la slita
se vun lè stuff el pianta ilè
senza guarda chi che vegn dedrè
e pé dopo el sa lamenta
se l' el partit el resta senza
am fà vigni in menta i caprizi di pupp
anga se adess i è gnanga più galupp
per el cumun i è doma dagn
e per cunt mè egh manca om pedagn
magari con dent anga no femna forta
i podaria finalment saraa la porta
e sta dent a lavoraa per el cumun
e più taca lita con nissun
omn altro problema lè la "ricucitura"
ma chilè la sarà pissee dura
i ga dacc incombenza a quai gent del mestee
ma i gent dèl paes i an capiss pissee
Rorè el gà miga de besegn de parol a mucc
ma de 'm progett che contenta tucc
pensem no volta a come l'era prim el teritori
e cerchem dè faa quaicos senza tanti stori
cerchem dè tiraa insema quaicos dè bon
adess che ghè gnanga più i barrier e la stazion
el piazzal che gh' vegnaria fora adess
el saria sicurament de 'm grand sucess
dè Sant Antoni a la Cioldina con no bela piazza in mezz
la podaria contentaa tucc i gent per om grand pezz
lè m' pezz che a Rorè a vegni più tant
anga se a som miga tant distant
ma fee in maniera che a g'abia véa dé vignii su
a vedee tutt chèl che ghè stacc facc su